



## **TOSHKENT VILOYATI OHANGARON TUMANI HOKIMI QARORI**

---

2022 йил «30» август

453-10-134-Q/22

Оҳангарон туман ҳокимлиги

### **Dafn etish joylarini saqlash qoidalarini tasdiqlash to'g'risida**

O'zbekiston Respublikasi "Mahalliy davlat hokimiyati to'g'risida"gi Qonunning 6, 25-moddalari, "Dafn etish va dafn ishi to'g'risida"gi Qonunning 15-moddasi, Vazirlar Mahkamasining 2011-yil 4-apreldagi "Dafn etish va dafn ishi to'g'risida"gi O'zbekiston Respublikasi Qonunini amalga oshirish chora-tadbirlari xaqida"gi 101-son qarori ijrosini ta'minlash maqsadida,

### **QAROR QILAMAN:**

1. O'zbekiston Respublikasi Vazirlar mahkamasining 2011-yil 4-apreldagi 101-sonli qarori rahbarlik va ijro uchun qabul qilinsin.

2. Tumandagi dafn etish joylari (qabristonlar)ni saqlash va ulardan foydalanish qoidalari ilovaga muvofiq tasdiqlansin.

3. Tuman Arxitektura va qurilish bo'limi (R.Yulbarsov), tuman sanitariya-epidemiologik osoyishtalik va jamoat salomatligi markazi (O.Tugalov), tuman ekologiya va atrof muhitni muhofaza qilish inspeksiyasi (Sh.Xolboyev), tuman obodonlashtirish boshqarmasi (P.Sherov):

- dafn etish joylarini saqlash qoidalarining tegishli qabristonlarda bir xilda ijro etilishi;

- qoidalarda belgilangan normalar mahalla fuqarolar yig'inlari raislari bilan birgalikda doimiy targ'ib qilib borilishini ta'minlasin.

4. Mazkur qaror "Ohangaron xayoti" gazetasida rasman e'lon qilinsin va

tuman hokimligi rasmiy veb-saytiga joylashtirilsin, ushbu qaror rasman e'lon qilingan kundan boshlab kuchga kiradi.

5. Mazkur qarorning bajarilishini nazorat qilish tuman hokimining o`rinbosari M.Tashbayev zimmasiga yuklansin.

**Tuman hokimi**



**A.Abdullayev**

Ohangaron tuman hokimining  
2022 yil 30 avgustdagi  
453-10-134-Q/22-son qaroriga  
1-ilova

## **Tumandagi dafn etish joylari (qabristonlar)ni saqlash va ulardan foydalanish qoidalari**

1. Qabristonlar bevosita tuman hokimligi tasarrufida bo'ladi, ularni zarur holatda saqlash va obodonlashtirish vazifasi tuman hokimligiga yuklanadi.
2. Qabristonlarni obodonlashtirish, ob'ektlarini saqlash va ulardan foydalanishga, dafn etish xizmatlari ko'rsatishga doir bevosita faoliyat tuman hokimligi tomonidan ta'sis etiladigan tuman obodonlashtirish boshqarmasi (fuqarolik xizmati ko'rsatish boshqarmasi) tomonidan amalga oshiriladi.
3. Qabristonlarni obodonlashtirish, mukammal va joriy ta'mirlash, ularni zarur holatda saqlash, mablag'larni xarajatlarning alohida moddasi bo'yicha ajratgan holda, mahalliy byudjet mablag'lari hisobiga amalga oshiriladi. Bunda go'rkovlar va marosim xizmatlari ko'rsatuvchi xodimlar ta'minoti tuman hokimligi tomonidan belgilanadigan tariflar bo'yicha ko'rsatiladigan pulli xizmatlar uchun aholidan tushadigan mablag'lar hisobiga amalga oshiriladi.
4. Qabristonlarni saqlash va obodonlashtirish uchun yuridik va jismoniy shaxslarning xayrehsonlaridan ham foydalaniladi.
5. Qabristonlarni obodonlashtirish fuqarolarning o'zini-o'zi boshqarish organlari ko'magida hashar yo'li bilan ham amalga oshirilishi mumkin.
6. Qabristonlar hududini obodonlashtirish elementlariga qabristonlar hududini to'siq bilan o'rash, dafn joylari, yashil o'simliklar, o'tish joylari, xiyobonlar, yo'llar va yo'lkalar, xo'jalik hovlilari, ma'muriy binolar va yordamchi imoratlar, muhandislik inshootlari va boshqalar kiradi.
7. Qabristonlar hududi to'siqlar bilan o'raladi hamda o'zaro yo'llar va xiyobonlar bilan bo'lingan, tartib raqamlari qo'yilgan sektorlarga, uchastkalarga bo'linadi.